

10

AU NA TAQOMAKA NA YAGOQU

IVAKAMACALA TAUMADA VEI QASENIVULI

Ni ko vakarautaki iko vakayalo mo vakatavulica na lesoni oqo, yalovinaka wilika ka vakasamataka na veika oqo: E dua vei ira na veivakalougatataki cecere ni yavu ni veivakabulai sai koya na gauna eda na mai vakayago kina. Sa gadreva kina na Turaga me da rokova na yagoda ka taqomaka vakavinaka. Ena vakalougatataki keda o Koya kevaka eda na vakayacora vakakina (raica na 1 Korinica 3:16; V&V 89:18–21).

VULI MAI NA ITAVIQARAVI

Tekivu ena dua na itaviqaravi ni veivakasoqoni. Me baleta na kena vakasama, raica na tabana e 3.

Masu Sureta e dua na gone me cabora na idola masu.

iYaloyalo Tukuna vei ira na gone ni sa solia mai vei keda na Tamada Vakalomalagi na yagoda ka sa rawa kina me vakayacora na yagoda e vuqa na veika totoka sara. Vakaraitaka na iyaloalo ka tiko ena tabana e 46. Dusi ira yadudua na lewe ni matavuvale era tiko ena iyaloalo o ya; ni ko dusi koya na gone dramidrami, mo taroga sara na veitaro e vaka na kena era vakaraitaki tiko oqo e ra. Ni ko taroga oti e dua na taro, sureti ira na gone me ra cavuta vata kei iko “Sega” ni ko kurea vakabalavu na ulumu mai na imawi ki na imatau.

- E rawa ni taubale e dua na gone dramidrami?
- E rawa ni vosa e dua na gone dramidrami?
- E rawa ni viritaka e dua na polo e dua na gone dramidrami?

Tukuna vei ira na gone ni dua na gauna era a gone dramidrami talega, ia ena gauna oqo era sa qasecake sara mai.

Sere Me ra tucake na gone. Lagata se cavuta na qaqa ni vosa oqo e ra ena ilagalaga ni sere “Once There Was a Snowman” (*Children’s Songbook*, 249) ka matanataka na qaqana e ra. Sureti ira na gone me ra tomani iko.

Niu a se gone, gone, gone. (*vakatakarakarataka ni ko mea tiko e dua na gone e ligamu*)

Niu a se gone, lailai, lailai, lailai. (*mo tekivu kala sobu sara tiko*)

Ia au sa tubu, tubu, tubu. (*mo sa tekivu tucake vakadodonu vakamalu*)

Ia au sa tubu cake, cake, cake, sara! (*mo qai dedeka cake na ligamu e dela ni ulumu*)

iYaloyalo Vakaraitaka tale na iyaloalo ka dusia na gone lailai e qito tiko vata kei tamana. Tukuna vei ira na gone ni gone oqo e tautauvata kei na kedra levu o ira. Tarogi ira na gone ena taro e tautauvata kei na kena era toka oqo e ra. Ni tarogi oti e dua na taro, sureti ira na gone me ra cavuta vata kei iko “Io” ni ko deguvacu sara vakavica.

- E rawa ni ko taubale? (*me ra qai taubale ena vanua ga era tucake tu kina*)
- E rawa ni ko vosa? (*ni wiliwili vata kei ira na gone mai na dua ki na lima*)
- E rawa ni ko viritaka e dua na polo? (*me ra vakatakarakarataka na gone ni ra viritaka e dua na polo ka ciqoma tale*)

Tukuna kivei ira na gone ni ra sa tubu cake tiko baleta ni ra sa kania tiko na kakana vinaka, era moce, ka sili me ra savasava tiko kina.

Vakatotomuri ni iVukivuki Vakaraitaka na iyaloalo e tiko ena tabana e 47. Dusia na kena iyaloalo na goneyalewa e moce toka ka vakamacalataka ni moce sa dua na sala eda na taqomaka kina na yagoda. Sureti ira na gone me ra vakatakarakarataka ni ra sa moce tiko. Me vakatotomuri talega na ivukivuki tale eso e tiko ena iyaloalo o ya.



IWALEWALE NI VEIVAKAVULICI

Me kilai: Ena gauna ni lesoni oqo, mo dau nanuma vakabibi na nodra gagadre na gone era vakaleqai tu vakayago. Sa rawa mo na veisautaka na taro e dau tarogi ena itaviqaravi ni veika vakaiyaloyalo. Raica vakatabakidua na veika era rawa ni cakava na gone, ka sega ni veika era sega ni rawa ni cakava. Me baleta na ikuri ni ivakamacala ni nodra vakavulici na gone era vakaleqai tu vakayago, raica na *Veituberi, Me ilutua Ni Noda Bula*, 43–44.

Vakatotomuri ni ivukivuki: Era na dau sega ni kila o ira na gone lalai na veika eso me ra cakava ena gauna ni itaviqaravi ni vakatotomuri ni ivukivuki. Me kena isosomi, sa rawa mo sureti ira me ra dusia na veitiki ni yagodra eso. Me kena ivakaraitaki, dusia na gusumu ka cavuta, “Oqo na gusuqu. E rawa beka mo vakaraitaka mai na gusumu?” Vakasausau ka vakacacavutaki ira na gone. Me vakayacori talega ki na veitiki ni yago tale eso.

iTinitini Tukuna na nomu vakavinavinaka levu ena vuku ni yagoda sa solia mai vei keda na Tamada Vakalomalagi. Sureti ira na gone me ra cavuta, “Au na taqomaka na yagoqu,” me vica walega na vosa ena dua na gauna.

Masu Sureta e dua na gone me cabora na isogo masu.

NA ITAVIQARAVI ME DIGITAKI

VAKAVAKARAU *Me baleta na qito ni kilakila mada:* Vakaraudaka mai ena dua na peleti e tolu se va na kakana bulabula, me vakataka na vuata kei na kakana draudrau. Vakaraudaka mai e dua na ka me ubi kina na kakana, me vakataka e dua na isulu levu.

Me baleta na itaviqaravi ni rokarokataki: Lavetaka na iyaloalo e tiko ena tabana e 47 me ra rokataka na gone yadua.

Qito ni Kilakila Mada Vakaraitaka vei ira na gone na peleti kakana. Dusia yadudua na kakana o ya, ka vukei ira na gone me ra cavuta na yaca ni kakana. Ubia na kakana ena isulu; ka taura laivi mai e dua vei ira na kakana o ya ka qai cereka laivi na isulu. Sureti ira na gone me ra kilakila mada na kakana cava e sa yali. Ena daumaka sara na itaviqaravi oqo kivei ira na gone era sa qasecake toka.

Malanivoso me Matanataki Cavuqaqataka na malanivoso me matanataki oqo ka sureti ira na gone me ra cavuta vata kei iko:

Sa laki moce o koya na gone lailai oqo. (*vakaduria e dua na iqaqalo ni ligamu*)

Sa vakatora toka na uluna ena ilokoloko. (*vakatora na iqaqalo ni ligamu o ya ki na qeteqete ni ligamu tale ka dua*)

Solegi koya sara vakavinaka ena itutuvi, (*qumia e ligamu na iqaqalo o ya*)

Sai koya oqo na ivakarau ni nona moce ena veibogi.


Sa kida mai na mataka ka sa tadola mai na matana.

Sa yadra mai ka ceburaka laivi na itutuvi. (*dedeka na ligamu me laurai ni davo koto na iqaqalo*)

Sa tucake yani ka vakaisulu ka lako, (*vakaduria cake na iqaqalo*)

Sa vakarau tu me matadredredre me cakacaka ka laki qito.

Rokarokataki Me ra qai rokataka na gone e yadua na ilavelave ni iyaloalo e tiko ena tabana e 47. Ena gauna era rokarokataki tiko kina, vakamacalataka ni ivakaraitaki oqo e vakaraitaka tiko e vuqa na sala eda na rawa ni taqomaka kina na yagoda.



IWALEWALE NI VEIVAKAVULICI

Na iTaviqaravi me Digitaki:

ena solia vei iko e dua na gauna mo vakayacora rawa kina eso na nodra gagadre na gone ena nomu isususu. Sa rawa mo digia ga e dua se na kena taucoko, ka rawa mo na vakayacora tale ena levu ga ni gauna o vinakata kina. Digi-taka na itaviqaravi era na dau taleitaka o ira na gone ka na vukea kina na nodra vuli ka. Sa rawa mo na dau vakayacora ni sa dodonu ka vinaka vakakina.

Rokarokataki: E sega ni o ira taucoko na gone era taleitaka na rokarokataki. Eso era na rairai tosia beka ga e dua se rua na maka ena pepa. Era se rawa tikoga ni vulica na veika mai na veiyaloalo eso, ena gauna mada ga era sega kina ni maqusa ena rokarokataki.



Au na Taqomaka na Yagoqu

